

劉向古列女傳

二





劉向古列女傳卷之三

仁智傳

密康公母

密康公之母姓魏氏周共王遊于涇上康公從有三女奔之其母曰必致之王夫獸三為羣人三為衆女三為繫王田不取羣公行下衆王御不參一族夫繫美之物歸汝而何德以堪之王猶不堪況尔小醜乎康公不獻王滅密君子謂密母為能識微詩云無已大康職思其憂此之謂也

頌曰

密康之母

先識盛衰

非刺康公


受祭不歸

公行下衆

物滿則損

俾獻不聽

密果滅殞



楚武鄧曼

鄧曼者武王之夫人也王使屈瑕為將伐羅屈瑕號
莫敖與群帥悉楚師以行聞伯比謂其御曰莫敖必
敗舉趾高心不固矣見王曰必濟師王以告夫人鄧
曼曰大夫非衆之謂也其謂君撫小民以信訓諸司
以德而威莫敖以刑也莫敖狃于蒲騷之役將自用
也必小羅君若不鎮撫其不設備乎於是王使賴人
追之不及莫敖令于軍中曰諫者有刑及鄢師次亂
濟至羅羅與盧戎擊之大敗莫敖自經荒谷群帥囚
于治父以待刑王曰孤之罪也皆免之君子謂鄧曼

為知人詩云曾是莫聽大命以傾此之謂也王伐隨
且行告鄧曼曰余心蕩何也鄧曼曰王德薄而祿厚
施鮮而得多物盛必衰日中必移盈而蕩天之道也
先王知之矣故臨武事將發大命而蕩王心焉若師
徒毋虧王薨于行國之福也王遂行卒于楸木之下
君子謂鄧曼為知天道易曰日中則昃月盈則虧天
地盈虛與時消息此之謂也

頌曰

楚武鄧曼 見事所興 謂瑕軍敗 知王將薨
識彼天道 盛而必衰 終如其言 君子揚稱



許穆夫人

許穆夫人者衛懿公之女許穆公之夫人也初許求之齊亦求之懿公將與許女因其傳母而言曰古者諸侯之有女子也所以苞苴玩弄繫援于大國也言今者許小而遠齊大而近若今之世強者為雄如使邊境有寇戎之事維是四方之故赴告大國安在不猶愈乎今舍近而就遠離大而附小一旦有車馳之難孰可與慮社稷衛侯不聽而嫁之于許其後翟人攻衛大破之而許不能救衛侯遂奔走涉河而南至楚丘齊桓往而存之遂城楚丘以居衛侯於是悔不

用其言當敗之時許夫人馳驅而弔唁衛侯因疾之
而作詩云載馳載馳歸唁衛侯驅馬悠悠言至于曹
大夫跋涉我心則憂既不我嘉不能旋反視爾不臧
我思不遠君子善其慈惠而遠識也

頌曰

衛女未嫁 謀許與齊 女諷母曰 齊大可依
衛君不聽 後果遁逃 許不能救 女作載馳




曹僖氏妻

曹大夫僖負羈之妻也晉公子重耳亡過曹恭公不禮焉聞其駢脅近其舍伺其將浴設帷薄而觀之負羈之妻言于夫曰吾觀晉公子其從者三人皆國相也以此三人者皆善戮力以輔人必得晉國若得反國必霸諸侯而討無禮曹必為首若曹有難子必不免子胡不早自貳焉且吾聞之不知其子者視其父不知其君者視其所使今其從者皆卿相之僕也則其君必伯王之主也若加禮焉必能報施矣若有罪焉必能討過子不早圖禍至不久矣負羈乃遺之壺

飡加璧其上公子受飡反璧及公子反國伐曹乃表
負羈之間令兵士無敢入士民之扶老携幼而赴其
間者門外成市君子謂僖氏之妻能遠識詩云既明
且哲以保其身此之謂也

頌曰

僖氏之妻 廉智孔白 見晉公子 知其興祚
使夫饋飡 且以自託 文伐曹國 卒獨見釋



孫叔敖母

楚令尹孫叔敖之母也叔敖為嬰兒之時出遊見兩頭蛇殺而埋之歸見其母而泣焉母問其故對曰吾聞見兩頭蛇者死今者出遊見之其母曰蛇今安在對曰吾恐他人復見之殺而埋之矣其母曰汝不死矣夫有陰德者陽報之德勝不祥仁除百禍天之處高而聽卑書不云乎皇天無親惟德是輔爾嘿矣必興于楚及叔敖長為令尹君子謂叔敖之母知道德之次詩云母氏聖善此之說也

頌曰

叔敖之母 深知天道 叔敖見蛇 而頭歧首
殺而埋之 泣恐不及 母曰陰德 不死必壽

